

少師朱襄毅公督蜀疏草

少師朱襄毅公督蜀疏草卷之

辭免尚書重銜疏

欽差總督四川兼制湖廣荆岳鄖襄四府陝西漢中一  
府軍務策應緩急督理糧餉兼巡撫四川等處地方兵  
部尚書兼都察院右都御史臣朱燮元謹奏爲寵命難  
承危病匪假乞恩辭免特允禡於事臣惟國家名器不  
可濫膺疆場倥偬難以卧理以臣庸碌本非軍旅之才  
謬司撻伐之寄仰藉皇上威靈平蜀搗蘭粗有頭緒而

不意黔事中變元兇被匿局面愈遠措置維艱臣晝夜  
徬徨舊疾日加形骸僅存喘息幾斷忽於五年正月初  
八日接兵部咨奉聖旨川兵已有成功朱燦元准加尚  
書職銜設官守土善後事宜并具奏施行援黔派餉等  
項都著從便斟酌錄首功恤死難卽與查行該部知道  
欽此又接邸報天啓四年十二月初三日該吏部題覆  
爲備述川土用兵等事奉聖旨朱燦元陞兵部尚書仍  
舊總督川湖等處地方欽此欽遵臣當設香案望闕叩  
頭外竊念涓埃未效顯秩渚加摩頂放踵豈其敢辭但

臆鼠之技已竭狗馬之疾滋深自去冬至今視聽俱昏  
飲食少進手足強半不仁文移盈案未決卽欲覩顏尸  
素其柰疆場何蓋臣行年六十蒲柳業已經秋臨戎五  
年形神爲之竝敝雖勉事醫藥而日就沉頓叨恩過厚  
報塞不前有心無力臣之命也每惟明主可爲忠言輒  
敢披瀝真情仰天呼籲伏望聖明特准辭免新命卽予  
休致速簡才望大臣前來交代俾臣得生歸里門一晤  
衰親卽捐棄重泉啣結何已爲此具本奏聞伏候勅旨  
天啓五年二月初四日上奉聖旨朱熉元已改調黔中

著遵旨前赴料理軍務不准辭吏部知道

議調建昌道臣疏

題爲議調才力道臣以安危邊事蜀中建昌一邊僻在西南爲通滇要道近者蠻苗出沒不常亟須道臣彈壓一日難缺該道員缺天啓四年八月內奉旨以監軍僉事胡平表推補頗稱得人奈本官奉命之後卽以病辭堅不肯赴臣差人促之至再至三又檄行按察司查催回稱本官委果患病已將該道札印吏部給發文憑辭繳各因覆前來又接貴州督臣兩次移咨欲借本官過黔督兵等因准此查得建南自雅州起至金沙江延袤

二千餘里中有桐槽白水半站巴松等洞番苗不時出劫行商雖經遣將掃清伏降然大羊之性靡常陰雨之防宜密胡僉事旣已病辭而建昌又不可一日無官臣謹會同巡按四川監察御史吳尚默查看得威茂道副使張法孔素負昂霄之品兼優戡亂之才莅任方新聲華茂著見今建昌印務係本官代攝合無就近以原官改調建昌道不惟地方有裨亦於事勢甚便至於威茂道雖係危邊事體稍簡查得監軍僉事加陞一級劉可訓提兵素饒雄畧搃藺已著奇功在事四年勤勞居最

除另疏題敘外合無加陞叅議填補威茂道員缺有事  
督兵進剿稍暇回道料理庶一轉移而地方得人邊情  
軍務兩有賴矣理合具題伏乞勅下吏部將副使張法  
孔以原官改調建昌道料理僉事加陞一級劉可訓加  
陞叅議填補威茂道員缺其僉事胡平表應候調理痊  
可聽黔中具題陞補施行爲此具本謹題請旨天啓五  
年二月初四日上奉聖旨



就近改補府佐疏

題爲就近改補府佐以綏殘庶事據四川布政使司呈  
奉臣批據重慶府申准巴縣鄉官張似渠張孝倪斯蕙  
王應熊胡芳桂吳嘉賓黃世澤賈元勳等揭稱敝邑遭  
亂以來劫也極矣承當道仁人不忌閔惻而賜之賢令  
長以爲梁肉屢就近調補蓋念巴人之不可旦夕無慈  
母也顧遷其地而能良車甫臨而逃效實無如今張知  
縣者莅巴纔三月而百里之內螻蛄頓息猾吏衙官之  
氣不知何往胥徒無趾於里巷者裨民無漁於影射者

寓撫字於催科之中去太甚於勞止之日魴尾赤而不  
殮肅鴻哀而還集向在師中時或謂其提兵夜出先登  
無讓服其膽決者或謂其督仁合一路餉經年不內顧  
運遵義一路餉每單騎詣道上閱實服其精勤者其治  
永邑也絕火耗少罰贖卹驛遞慎大獄其愛人以仁以  
勇其御事以識以力其事上以直以誠雖古循良莫加  
焉居無何有岳陽佐郡之擢國人爲之愴歎曰方予之  
以母而遽奪之也相與奔奏請禱與幸終噢咻之其說  
已具士民呈狀中此與異時情面攀留者不可同年語

仰惟當道仁人所欲與聚巴人如嬰兒之忽去其乳實  
不勝其喁喁敢合喙以籲等情到府又據重慶府巴縣  
兩學生員劉世澤錢嗣起等呈爲保留賢牧懇乞轉詳  
就近改補以福殘黎以慰羣心事呈稱苦茲巴邑慘受  
兵戈向來羽檄交馳至今瘡痍未起援黔運餉尙無息  
肩之期拯溺救焚必賴循良之令幸遇署縣張父母當  
叱馭入川之日正督兵奪關之時初聞變而策單車輕  
三巴之險慷慨不減王尊旣蒞任而殫獨臂捍孤城之  
危保障真符余玠於時歷千里而置郵不繼閱數縣而

煙火不通能爲無米之炊兼備盤根之苦恤驛養馬躬  
親餵飼之勞爲法持平必爭百姓一命之寃有緣下邑  
得借代庖薄賦省刑雪冷萊蕪之饑民安事治風清單  
父之琴設木阜而追呼不假於卒徒三村無捕蛇之擾  
革火耗而餘羨不入於縣帑百里頌懸魚之操衙蠹避  
而六案霜清流民歸而四郊春藹方喜塗嶺有天乃報  
岳陽二守在朝廷賚功之典非所以酬殊勲而小民戴  
澤之私幸可以徵永甯縱主臣不擇地而任但敝邑期  
得人而濡念切思何願同借冠今本府二守正缺乞詳

就近題陞以惠三巴父老子弟引領慰私等情據此該  
本府知府余新民看得永川縣知縣張堯揆真心實政  
潔守長才治永久著令舉署巴縣起賢聲委應清華之  
選忽報轉岳州郡丞巴民思之不啻如赤子之失怙恃  
也相率泣留乞補本府同知員缺夫渝岡殘破之餘又  
值軍興之際調停撫綏剔釐振刷非得有仁愛識力者  
不能勝其任而本官固饒爲之卽投以所甚難蓋爲地  
擇人非爲本官計也旣經鄉紳士民全詞以請相應通  
詳合無俯從題請將張堯揆改補重慶府同知以安地

方生民之望等因錄詳奉批仰布政司覆議報奉此又  
蒙巡按溫御史批據該府呈同前事蒙批知縣張堯揆  
才品治行當爲蜀令白眉今值援鄰固圍之時倚賴尤  
切留用甚宜布政司會同巡上東道查議詳行繳蒙此  
該本司移准兵巡上川東道署道事知府余新民覆看  
牒錄前來該本司左布政使史文煥查看得永川縣知  
縣今署巴縣事張堯揆根心德政信手經綸招徠澤及  
哀鴻撫字春生枯骨其治永而永人恨其來暮及攝巴  
而巴人又恐去之疾也如設木阜追呼不及於鄉村減

贖銀絲毫不苦於百姓據鄉紳公揭述民謠云省一年  
勾攝之費與完贖納糧之餘卽可以抵一年之額賦此  
亦足爲本官實錄矣且其監軍轉餉繕兵緝邪勞績尤  
多當此巴蜀多事之秋若以本官就近題補本府同知  
不惟嚴邑有賴其於時艱匡濟亦非淺渺者旣經道府  
及鄉紳合詞前來伏乞會題以慰羣望等因通詳到臣  
該臣會同巡按四川監察御史吳尙默看得永川縣知  
縣今陞湖廣岳州府同知張堯揆揮霍應變之才堅白  
不染之操到任時渝城未復將永川一片瓦礫招徠收

拾漸有頭緒而又督餉遵仁兩路備殫勞績近署巴縣數月譽騰萬口報陞岳州同知本官亟擬就道矣但殘地苦於乏官窮民亟思良吏巴東一帶三道俱未蒞任一切援黔點兵督餉最苦乏員既爲地擇官不當爲官擇地合無卽以本官填補在籍病故重慶同知趙廷忠員缺俾其就近料理軍前一應事務庶於事體最便而民情亦少慰矣理合具題伏乞勅下吏部覆議上請將同知張堯揆改補重慶府同知填趙廷忠員缺移咨前來以憑行令本官任事其岳州府同知員缺另行推補



施行爲此具本謹題請旨天啓五年二月初四日上奉  
聖旨

開銷三年用過錢糧疏

題爲清查三年用過兵餉具報收支細數伏乞勅部覆  
查開銷事蜀自征播採木之後公私交困庫藏若掃及  
元年調兵三萬遵奉部劄將一切大糧摻那三十三萬  
除各兵領過外在重慶庫者悉被賊劫不可復問及賊  
攻圍省城用過在庫併捐助等項一十六萬二千五百  
七十三兩一錢五分六釐四絲五微皆左布政使周著  
司其出入圍解之後該前任督臣張我續莅任所用錢  
糧已經本官另疏開報其各司道州縣督兵赴援徑自

開銷者聽按臣查實另報外臣自天啓二年五月初四日入叙州府二賊率衆已在隔河此時分毫無措該布政司議詳通省各屬除殘破極重者外其餘州縣各將應輸正項錢糧分作上中下三等上者預徵銀六錢米四斗中者預徵銀五錢米三斗下者預徵銀三錢米二斗以應目前之急秋間開徵卽除去前數竝未有絲毫之加天啓三年亦復如之比至秋間各賊披猖未已而松潘威茂建南馬湖等處餉銀全不接濟所在脫巾禍且叵測是時所兌楚餉止解到七萬兩諸司道齊來告

臣謂彈瘞者不復顧痛若再因循各兵盡散且無全蜀  
安得有民臣不得已一而拜疏通省每石糧議加派銀  
六錢米三斗亦分三等遞減徵用一面移檄起徵及未  
奉俞旨而各有司遂多因循強半不解總計自二年九  
月起至天啓四年十二月止藩司共解銀二十四萬八  
千九百八十七兩七錢八分各屬徑解五十四萬六千  
九百九十七兩六錢五分四釐三毫五忽二微臣與按  
臣薛敷政張諭溫臯謨吳尙默共捐助銀五萬二千八  
百二十七兩八錢七釐除貯藩司未解者實解到二萬

一千五百四十六兩四錢四分三釐又各司道有司紳士捐助摺括共銀一萬八千四百一十七兩五錢二分一釐二毫三絲通共八十三萬五千九百四十九兩三錢九分八釐五毫三絲五忽四微查得平時遵義戍兵每年額餉三萬兩三年計之共該九萬兩總鎮標管官兵每年額餉一萬五千兩三年共計四萬五千兩總計共一十三萬五千俱該布政司額解年來各兵俱食軍前之餉其該除去一十三萬五千兩外共收到蜀中藩司及合屬解到銀六十六萬九百八十五兩四錢三分

四釐三毫五忽二微此蜀中錢糧之總數也蒙皇上捐發帑金兌於湖廣布政司轉解并南京戶部及河南絲價前次開銷四十四萬六千五百四十八兩五錢餉臣丘兆麟又催解到五萬兩南京戶部又解五萬兩通共五十四萬六千五百四十八兩五錢此解到協濟餉銀之總數也及查兵數自江門遵義建武三處失事綿亘二千餘里賊忽東忽西無日不出衝犯臣分爲五路集兵十六萬有奇日日堵殺自二年五月起至天啓三年四月攻取永寧五月取古蘭至七月遂撤去六萬十二

月掃清龍場追賊至畢節大方至天啓四年二月班師  
臣又汰去五萬留二萬五千守永寧二萬守遵義五千  
守土城又一年於茲若按日而給直須得三百餘萬幸  
臣所用皆係蜀人深知措置之艱或給印票或願報效  
卽管中日報餓死未有譴者臣每見所遣材官自永寧  
遵義而出皆鵠形菜色號泣悲訴臣亦對之欷歔總付  
諸無可奈何而已至於餉米一節未有驅人死地而可  
令枵腹者蜀中士民所苦最在運夫而米在旱道非夫  
與騾何由得入連年用夫各州縣里長攬頭祇圖科歛

全不奉法有未到而逃者或一運而逃者據各有司具  
詳情願折價臣行總餉道會議願折者官與代雇願運  
者仍舊赴運今川西川北咸願折價大槩以糧十三石  
派夫一名每名折銀八兩共解到夫價銀一十三萬三  
百四十一兩七錢六分五釐四毫九忽七微八塵陸續  
雇夫轉運永寧仁合等路餉米重慶府屬路近遵義情  
願赴運將夔州府折夫價銀一萬七千一百六十兩徑  
解重慶雇夫搬運遵義一路統共運過餉米五十萬一  
千二百七十六石九斗九升七勺五抄三圭此夫米之



大數也該臣屢疏陳乞蒙戶部科道議題奉旨天啓二年留用協濟湖貴陝茶蠟遼餉及昌平富戶等銀三十二萬三千九百一十四兩三年分共留銀二十六萬六千三百一十四兩四年分議留二十六萬五千二百四十四兩以上通共八十五萬五千三百七十二兩與臣預徵加派併米數相抵外所少者雖不過六萬五千兩有奇但部文所開多係虛數如秦餉十萬兩在無事時每年起解不過三四萬兩今兵火摧殘益無設處留黔餉三萬九千八百餘兩在下川南一帶百姓逃亡尚有

未開徵者典鋪一萬兩馬夫祇候銀八千兩蜀中原無  
此項平糶倉穀已碾米解發軍前用盡又如屯糧一項  
東之重慶遵義南之叙瀘建武西之寧川五衛俱被殘  
破惟川北之利保下東之瞿塘俱高山瘦土頻年拖欠  
追徵不足雖有扣裁二萬五千兩稅契一萬兩優免五  
千兩合屬亦以殘破難徵止解三分之一統在前布政  
司解到二十四萬八千九百兩之內大抵蜀民萬死驚  
魂蜀地一片灰燼甫離湯火忽起催科匪惟預徵又且  
加派旣折糧以買米又撥夫以起運頭緒多端騷擾滋

甚士民嗷嗷皆無樂生之心雖訛傳不無過實而愁苦  
哀鳴情景最慘今援黔用兵計更無排除行布政司酌  
議明白另疏上請外臣沉痾日久見求禳斥所有軍前  
用過錢糧干係匪細不得不爲具題伏乞勅下戶部轉  
行四川巡按御史通將圍城內外及前督臣張我續支  
用并各道合屬徑自徵用同司道鄉紳士民捐俸助餉  
各項錢糧與臣用過之數一併委官查盤核實造冊具  
奏施行庶查銷明而支用分別矣爲此具本謹題請旨  
天啓五年二月初四日上奉聖旨

叙錄從征文武功次疏

題爲蜀難旣清藺穴盡掃謹叙文武功罪以示激勸事  
蜀自天啓元年逆賊奢崇明父子計乘調援陡發大難  
慘殺多官占據重慶因而攻圍省會虐焰滔天仰仗皇  
上威靈殺賊收遁督臣張我續整率兵將恢復渝城擒  
斬首叛逆賊臣亦移駐叙府督兵恢復叙南建武瀘納  
仁合等處俱該督臣張我續具疏獻俘併將各路文武  
功次叙疏上聞外嗣後六七月間官兵進取忽有江門  
等處之失督臣奉命援黔解維東下盡以蜀事付臣是

時賊雖在巢而糾結水西烏撒諸苗爲之羽翼加以都  
都卜昏楊保舊民並起響應左衝右突曾無寧日西自  
建武東至遵義二千餘里之遙處處受敵應接不暇臣  
與按臣張論晝夜徬徨相與會議以僉事劉可訓馬湖  
府知府鄭朝棟先任同知今加陞僉事段師文先任推  
官今加陞僉事胡平表率叅遊張邦紘范繼道與加銜  
將官潘映奎王懋官等同任長寧建武二路以叅政今  
陞左布政閔夢得副使今陞偏沅巡撫李仙品率叅將  
林兆鼎加銜將官鄧懋官劉養胤等同任納谿一路叅

政王世仁副使今陞太僕寺少卿徐如珂率將官羅乾象薛來衍譚大孝王元第馮世脩等同任仁合一路叅議趙邦清僉事盧安世率副將沈崇極秦衍祚加銜將官侯良柱鄧朝用等同任遵義桐梓落紅一路叅政今陞按察使吳國仕率加銜將官陳一龍趙文進駱麟等任遵義綏陽一路嗣有遷轉等項陸續改委安綿道副使謝渭入永寧重慶府推官李必達入綏陽同知商良弼涪州知州朱毅臣入桐梓夔州府推官蔣化龍同知劉鼎新入仁懷後遵義道副使侯國知府胡悅安俱新

任至其集兵十六萬有奇又陸續委原任叅政陳龍光  
吳光義副使赫奕僉事錢時叙州府知府劉澤大重慶  
府知府余新民同知翟文簡王國治劉國藩通判梁文  
燧馬湖府陞任推官周嘉誥達州知州黃立言真安州  
知州楊汝昌蓬州知州商之彝南川縣知縣韓應龍恭  
江縣知縣鄒昌魯筠連縣知縣岑昌運西充縣知縣程  
士升永川縣知縣張堯揆安岳縣知縣趙民戴梁山縣  
知縣周維軫汝寧縣知縣耿堦等分督五路餉務部署  
甫定賊率大衆於九月十七日突犯長寧守將范繼道

先鋒馬湖營領兵官張才等望風奔退獨原任富順縣縣丞葛盛德率五百人血戰殺賊頗多旋俱陷沒賊遂徑趨建武守將張邦紘同知府鄭朝棟以糧運不到先期撤出賊見城空遂於九月二十日徑趨高縣目中已無叙府矣適僉事劉可訓新任閱兵到縣提臣所付令劔謂衆將曰奉令堵賊我死於此有言退者斬於是衆將懾服而鄭朝棟所統王懋官等張邦紘所統周良材等兵俱集遂列營高家埧扼險樹柵凡賊所用奸細廖文澣等百餘輩無不擒戮又遣都寧驛驛丞姚化民募



死士夜燒其營壘三十五所二酋睥睨四十八日屢屢  
窘挫至十一月初七日夜間遁去可訓使曹有才周良  
材姚化民李忠孔全斌等分路追之通共斬首三百一  
十七顆救回被擄男婦五千四百名口盛甲鎗刀一百  
四十二件方相持高縣之時臣慮賊勢浩大令中軍魯  
美中守備李必茂魏民望等率兵於沙河策應一面馬  
上密檄納谿仁合遵綏各路共搗其後叅政閔夢得李  
仙品等遣副將劉養鯤等率輕騎直殺入宋江橋擒僞  
總兵楊選妻女追酋小妻馬氏不獲焚其營舍斬功一

百二十九顆遵義府城自推官馮鳳雛死難久爲賊據至是叅政吳國仕率任國瓚陳一龍趙文進駱麟等於九月十六日敗賊扶國禎等再爲恢復至十一月十三日賊又忽出納谿先鋒李縉戰死鄧懋官左營千總余騰龍斫柵先逃累累薶江魚之腹其餘被賊四面圍定叅政閔夢得副使李仙品發張令秦國倖等救之賊散而復合直至二鼓發勁兵過河衝殺嚴圍始解次日秦翼明兄弟同秦良玉統兵俱至兵勢復振賊又於十二月十八日轉攻栢楊固黔中守將楊通霑禦之與戰數

次賊俱敗遁原任綏陽縣知縣任寵率賂麟王尚明度朝榮等接應賊渡江而走斬功二十九顆僉事趙邦清督侯良柱等出大路攻克大灣石寶瓮坪一帶斬惡目石良三父子陸續招降羅安良安鑾趙國璽雷震乾等共一萬一千九百名口盧安世率沈崇極秦衍祚等由小路攻克竹瓦一帶洞寨招降羅一相簡維仲等多家是時大將李維新到任住劄納谿會同二道用劉養鯤計使降將鄧价等於十二月十九日直搗葛石堽斬級一千五百一十五顆生擒七十六名口招降大苗日喻

釗毋繼先等七百名馬二十匹槍刀弩絮三十三件天  
啓三年元旦養鯤全張令等又夜進除斬功六百九十  
七顆焚寨外擒其僞總兵喻聯芳而出初九日賊又衝  
出仁懷羅乾象薛來衍等戰於小峰埡斬其頭目阿興  
等共二百九十一顆奪馬四十四匹十一日范繼道出底  
蓬擒賊吳啓正等二十名十二日知府鄭朝棟推官胡  
平表分發潘映奎周良材等攻打都都卜昏各苗共斬  
賊級三十四顆生擒三十六名馬四匹槍刀器械三十  
八件各苗俱用木刻拜伏乞降五寨悉平乃旋師至二

十四日賊統大衆分兩路突犯長寧鄭朝棟胡平表與  
土通判李泮王鼎等分頭血戰追殺十里次日再戰於  
竹洞水劉僉事率張邦紘等移營策應共擒斬三百六  
十七名顯槍刀甲絮二百一十二件救回被擄軍民二  
百九十五名口二月初六日范繼道移兵仙人庵賊忽  
奄至僉事段師文揮刀率各兵馮高對擊斬級十四顆  
生擒一名材官孫世信毛民望戰死十五日羅乾象率  
譚正脩譚正常土官覃寅化等與賊大戰恢復仁懷土  
城等處斬首二百三級僉事盧安世同沈崇極秦衍祚

張奏凱舒洪烈等由陶竹壩進據落紅口屢戰屢勝擒斬六十六顆燒賊御營及羅向宸等房一百六十餘間刀槍器械三十八件馬四匹招降羅華王正相等四千九百六十名口十七日賊大眾又出仁懷前鋒馬邦瑞求援不至遂被擄薛來衍血戰負傷適叅政王世仁督叅將鄒蔚然等援至賊乃退去十八日總鎮發標營盧世卿兵屯象嶺賊四面驟至不戰而潰賊見稍利又於二十七日糾步卒七八萬馬兵二三萬復犯長寧戒其部下入營就食入叙受賞虐焰肆張山谷俱震是日胡

平表鄭朝棟土通判李泮等共連絡結營囊沙劄水與賊對打劉可訓同范繼道等各盡發兵應援賊遣精卒數千從下流包截放水衝之泮沒幾盡至午後平表開柵大呼曰槍先出部曲隨之各營併力賊遂大敗當擒偽監軍李楫斬賊級六百四十七顆生擒五十八名獲馬三百餘匹刀槍盔甲器械七百餘件泮死殺傷萬餘守備袁可成斬一頭目獲舊鎮守四川總兵印一顆賊父子相失各埋草間夜分遁去死者逃者不計其數二賊計盡無復又輦金帛借水西阿烏述馬步兵八九萬

先犯遵義安羅二村守將侯良柱陳一龍等俱潰賊旋至落紅口盧僉事所督將官張奏凱等亦潰臣思我兵分爲五路每路又分四五處馬步衆寡之勢委不相敵乃乘賊間密囑叅政閔夢得督鄧懋官劉養鯤范祖文胡汝高等兵五千守定納谿列陣示敵以牽兩酋一面檄總兵李維新同副使李仙品督同秦翼明等兵俱改由長寧會兵而進甫劄拖船埡賊又驟至連營相拒三月二十五日總鎮發張令秦國倖李鴻功劉宗良盧世卿等戰於麻塘坎二十六日戰於瀘州衛賊俱大潰所



扎珍蛇洞太平九姓二長官司濫竊得用得貢當落垓  
龍山等一帶營寨盡行燒燬生擒僞都司叅將柳信明  
等八十五名斬級五十七顆招降僞將王文等三千八  
十五名救出洞中避難者百戶戴鳴鳳等一百餘名口  
四月初三日秦翼明秦拱明秦可等戰於青山岩乘天  
黑霧殺戮下一洞幾盡直上第二洞賊來迎大敗擒僞  
丞相章守謂并胡宗祿妻妾二人斬首二百一十六顆  
生擒一百五十九名牛馬五十一隻匹龍傘盔甲槍刀  
器械九十二件燒燬逆賊十七營是時叅政閔夢得亦

於初六日督將官劉養鯤鄧懋官畢應台等直上江門  
馬克橋等處擒其把隘僞將柳元儒等次第打破仙人  
寶月橫山八里中吊三溪等處燒燬涼傘紅岩衙舍營  
寨斬功六百七十三顆於是各路守隘之賊盡散聚於  
土地坎賊會集水西烏撒援兵多出犒賚憑高據險欲  
與官兵決一死戰大將麾諸將進多不敢應副使李仙  
品厲聲曰有進無退身請爲先僉事劉可訓謂諸將曰  
爾若要走直須走到省城眼前一轉足豈復有生路乎  
與知府鄭朝棟並力趣之至夜分秦翼明兄弟與馬齡

郭起柱秦可等願任前驅兩道大喜立判賞券卽於四鼓發兵天明接戰直至午後前鋒多被重傷抵死不退兩道連發兵接應及斬僞總兵吳繼用賊遂披靡奢寅自出臨陣被創遁去奪其所乘馬併僭僞儀仗共斬級八百一十五顆被傷溺水者無算生擒一百五十八名兩道卽時正法訖水西各酋之兵見酋戰敗飽掠而走大將身先士卒勒兵並進於是二酋知大勢已去盡焚城中室廬列兵紅崖山上城中男婦投出二萬餘人大小官兵四至追之遂走俞家山又走獅子山共擒獲有

名大頭目周邦大徐應龍妖教首劉明選等一百一十三名又招回被擄指揮袁繩武等男婦二萬餘名口斬級一千二十八顆臣與按臣張論先期草檄數道隨軍戒勿妄殺人心少輯永城遂定十八九等日知府鄭朝棟督王懋官周良材等攻天臺固苗羅市羅于朝父子等率苗兵數千投降獻出酋委寄金女冠段正等物共一百一十八件羅乾象譚正脩等陸續攻破白崖楠木樂用青岡等固寨五月初三日又攻破銅鼓坪等處固寨斬功二百六十二級守備張明遠招出羅書成舒

廷采等苗民楊謝等家萬餘忽水西援兵分兩路驟至一路入永者林新寨不動一路出古蘭叅政王世仁副使徐如珂并督羅乾象譚正脩譚正通等并中路覃懋勲等設伏以待至五月十三日大戰兩晝夜陣斬水西惡目魯仲賢併軍師羅奇割級五百四顆其跌溺而死者不計其數生擒西賊阿呼把等七名於是二酋隨水西敗卒夜遁過河割於龍場客仲壩係水蘭交界之所官兵齊集古蘭州燬賊所建九鳳樓掘其墳墓苗千年巢穴踐爲平地臣慮內地各苗陰陽難測檄總鎮親督

各將分頭攻打各圍寨薛來行打官斗山等處賊目西  
兒出降胡汝高畢應台等攻木角猪嘴二等等圍寨數  
十處賊目祝義明喻訓等出降范繼道等打水潦斬其  
頭目岳在榮其黨曾榮耀羅第哥出降總鎮標下守備  
李棲鳳千總李維世總旗李棲鳳李維忠等於十七十  
九二日攻破新寨斬二百八十三級生擒二名僉事盧  
安世率張奏凱王正相張洪烈等攻克唐朝落比等寨  
侯良柱高象乾等打破馬湖營鬼么等寨招出劉顯耀  
等共二萬三千三百二十二名口嗣後牯牛酸棗木姜

等國馬蝗發窩滑石等洞俱相繼聽撫其餘負險拒敵擒斬在冊內地既粗定大將親提兵至馬鈴河賊見官兵卽展轉深入每以糧盡撤還是時按臣溫臯謨銜命下車與舊按臣張論交代卽申嚴軍令捐費大犒人心競奮九月二十七日李維新復督兵親至鄆家渡與僉事盧安世合兵造搭浮橋業將渡河賊若前若却陽以綴我一面結水西大眾潛渡赤水以抄我後適范繼道偵的預報總鎮卽撤兵於十月十五日回至永城料理守禦西賊果分三路一用大壩諸苗爲導出瀘州衛以

截糧道遣張令張學禮等於十八日連戰大勝斬級一百一十顆遂俱遁去一路由尖山子出永寧後守將劉養鯤據險固守賊不能入一路於二十四日徑犯永寧東門馬步之卒漫山塞野而來是時副使李仙品僉事劉司訓俱染瘴病甚多有獻退避之策者二道遂扶掖登城誓死督戰盧世卿部兵方虎斫一頭目落馬卽與厚賞衆心鼓舞總鎮親自披掛督各將大戰賊遂不支至晚遁去止伏數千人於落窩落彼兩溝之中次日官兵四面攻圍斬級九百三十顆奪獲刀槍器械二百五



十二件道鎮議大壩卜昏諸苗屢降屢叛不可姑息臣  
隨發檄會兵剿之擒斬二百七十一顆其餘俱逃入鄰  
苗界內遂焚其室廬取糧數千石而還自此雞廠鍋廠  
白崖白撒萊豆白旦對車小水長江以內土地悉皆勦  
撫平定陸續擒斬招降在冊隨檄各路道將以十一月  
二十四日五路齊進賊覘知之乃先發扶國頑樊虎等  
開路欲由芒部逃入建昌頭目王繼宗等向懷忠順密  
受臣諭於十九日夜歃血起義被李遠達等泄之二酋  
得信卽踰牆而遁時永路李維新督秦翼明等官兵自

上河口入遵義侯良柱等官兵自崖下先入盧安世同  
仁合路羅乾象等官兵自卧魚河入五路駢集追獲崇  
明妻安氏并奢崇輝奢史都李遠達蔡金貴等起解投  
降者男婦二萬餘名口畢節層臺一帶降者更衆二逆  
操入沙壘等官兵分路窮搜終有條無爲期一  
二月之久竟不可得臣令總兵李維新遣叅將林兆鼎  
率譚正脩冉世烘等兵共一萬搗破羿子猱猱和尚三  
關直入大方又令遵義二路道將侯國盧安世李必達  
知州朱毅臣等羅乾象侯良柱陳一龍等并永路分兵

二萬攻打崖上水頭囤朱毅臣率部士冒險先登奢富  
初降自誓獻賊後復遁去二賊遂隨莫德逃入火勺總  
鎮一面追尋一面分兵二萬同胡平表段師文范繼道  
等攻打畢節梅子哨等處以上連日擒斬招降在冊隨  
准貴州王撫臣咨文內稱黔師入水西大方以來勢如  
破竹蜀兵林兆鼎等已經犒賞發回只因西賊又出暫  
留援手且屢次咨約於天啓四年正月初三日兩省夾  
攻水西火勺而林兆鼎且送被羈副使張起鶚回蜀臣  
得報復遣道將兩路夾攻不虞黔師已於正月初三日

徑撤回省蜀兵日日與苗截殺將頭目補窩阿體等房  
舍積聚數十處盡行焚燬擒斬有差至二月初五日始  
撤還永寧臣因思曩者播州之役三省連兵四面攻圍  
囚窮無計乃保險固今賊旣以前車爲戒且有後窟可  
依獨馬單人踪跡最危高山密箐覲面難逢愈追愈走  
愈走愈遠惟是逋逃有主未能立縛諒此遊魂假息定  
難久匿巴蜀一隅可少寬皇上西顧之憂矣凡爲臣子  
効力除兇自是職分况禍本未得詎敢言功顧賊之連  
結甚廣披猖特甚改元僭號尚薄雄特之圖戮官屠民

不啻巢溫之慘在我習於積玩全無預備兵旣烏合將  
多白徒初則血戰分五路之遙繼則追奔在千里之外  
各文武吏士皆冒險深入與死爲鄰吸毒殄腥受人間  
未經之苦攀崖涉磴開洪荒未闢之區卒令巢穴盡傾  
毋妻不顧僞侯假相並就俘囚險嶂幽岡忽披日月錦  
江還文治之舊觀銅柱標漢官之物色各官大小數百  
戰之勞二年之苦亦有難泯者查擒斬截殺五路總計  
生擒一千九百二十四名斬功二萬七千四百九十二  
級俘獲一萬七百三十二名口招降大頭目一百三十

四名及內外四里卜昏都都及遵綏桐仁水西畢節等處黔蜀連界漢夸苗民共二十九萬三千二百六十四名口當陣奪回被擄男婦五千五百五十三名口槍刀衣甲器械六千五百四十七件牛馬一千一百一十二隻匹印信五十七顆僞印關防十三顆僞勅曆劄二十九件五路陣亡官兵李縉等二千六百八十八名輕重傷一百九十四名至於左道之變蜀寔首難初則僞榜僭號攻掠州城繼則主謀內應禍遍通省妖書紙甲與夫神符鬼臉等項不可勝計幸爾乘勢撲滅擒厥渠魁

是亦廓清之一端也是皆我皇上聖武布昭天威輝赫  
突豕當龍飛之首信多難之興邦犁庭收虎闕之功真  
至仁之無敵蓋制勝允在廟堂而成功卽在指顧煌煌  
赫赫宇宙爲昭臣萬不敢仰貪天工而皇上軫念勤勞  
特許優叙臣思窮兇挺險旣殘局之未終鄰惡新援又  
用兵之伊始且臣碌碌多罪之軀已蒙皇上特恩洊加  
顯秩而舊督按臣併文武諸將吏經理辛勤血戰勞苦  
若不爲一叙亦無顏再爲督率爲是躊躇歲餘冒昧陳  
控除內閣重臣一德調元純衷體國贊廟謨尹任周兼

尊俎預折衝之略籌邊事房謀杜斷笑譚成犁掃之勲  
功在鼎彝威行華夏聖明自有特典非臣所敢僭擬前  
後本兵大臣渭水協符老人奇授削平妖亂方歌袞繡  
於東方指示兵機迅掃妖氛於西土威名夸夏俱震功  
業竹帛爲昭司農大臣經時良策憂國焦心百計以督  
轉輸不啻醪續之感士萬里而蘇憔悴恍若饑渴之切  
身心懸社稷無私名與旂常並永兵垣諸臣力驅當道  
名重朝陽借箸籌邊無非帷幄之勝筭盱衡體國卒收  
邊境之崇勲職方諸臣法精司馬才擅人龍入叅樞莞



之謀明同觀火出畫縱指之策績著犁庭此卽酬功自  
有特典臣亦不敢擬叙如原任總督臣張我續浴日補  
天力量轟雷掣電丰神七豹家傳指顧落妖氛之膽雙  
龍氣吐笑譚清巴蜀之塵功在三川名高九鼎湖廣巡  
撫薛貞岳峙淵凝雅度雲蒸霧蔚弘猷籌畫切於鄰封  
有呼必應聲名警茲蠻服無遠不懷西上瞻依南天砥  
柱原任鄖陽巡撫今陞貴州總督楊述中國難家憂竝  
切文揆武奮咸宜徒旅騰驤大振桓桓之氣雷霆煥燁  
允符正正之旗心力俱勞廓清有賴原任鄖陽巡撫今

陞雲貴總督兵部右侍郎蔡復一經濟參天震地籌謀  
出鬼入神定謀於先不以賊遺君父應變若素自能身  
作金湯允號丈人懋襄大難原任陝西巡撫今陞漕運  
總督呂兆熊精凝體國籌邊力足肇華撼海袖出女媧  
之石缺陷旋襄身乘博望之槎艱危立救威稜具悚汪  
濊無涯原任陝西巡撫今陞兵部左侍郎孫居相峻品  
雪山映玉定力汪海迴瀾三關八水之赫靈遐荒竝震  
十圍五攻之神秘閭省遙披計切輔車功垂金石先任  
巡按御史張論蓋代材名匡時謀畧明賞飭罰伸三尺

以無私決策籌機潛九天而妙應山河永勒茂績兒童  
咸識重名巡按御史溫臯謨塞天正氣救世弘籌攬轡  
澄清誓豺狼之淨掃登壇規畫肅貔虎以長驅三川竝  
論福星四夸共憚雄畧今任御史吳尚默五夜爐香獨  
徹尚方劔氣常寒灑甘霖以救瘡痍未起之民捐犒賞  
而賑庚癸頻呼之卒歡騰組練春盎問閭督餉御史丘  
兆麟百念畢營軍國一身係重安危飭章程而八法皎  
如列眉督轉輸而萬衆欣其果腹威揚閭外名竝關中  
俱係憲臣不敢擅擬謹將文武在事各官據監軍各道

所開臣撮其大槩第其功次一一爲皇上陳之鎮守四  
川總兵官李維新丹心許國正氣凌霄百萬貯於胸中  
山川生色六奇扣之囊底蛇豕驚竄績已著於開疆名  
更高於勒柱所當大加優擢仍與恩廕以酬其勞者也  
監軍道右布政使今陞偏沅巡撫李仙品浩氣吞吐虹  
蜺赤膽昭回天日審機應敵力能迴日排雲履險誓師  
功著犁庭掃穴監軍左布政使閔夢得雅意誓申國恥  
沉謀允合師貞兵不務多而貴精奇潛九地戰每先計  
而後陣動取萬全叅政王世仁擔當水火不避鎮定山

岳不移恢復州城功對瀘川並永發縱古蘭名與土城  
並高叅政今陞廣西按察使吳國仕才名振迅意念精  
勤履任經年祇是草行露宿恢城屢戰卒令氛靖烟銷  
副使今陞太僕寺少卿徐如珂矢心忠赤一腔彈指風  
雲八陣挈巴城以還社稷辛苦備嘗殲賊援而闢酋荒  
勲庸最著副使謝渭精心似鏡執法如山汰黜冗浮舉  
大小衆寡而咸懾處分周密雖竹頭木屑之得宜僉事  
劉可訓一身是胆六出皆奇仗劔督兵誓捐軀以當危  
敵好謀善斷鼓群力以震遠酋僉事盧安世沉怡雅度

恢拓長材料敵洞中機宜正奇迭用臨陣親撓矢石士  
馬騰驤僉事段師文赤志匡時通才應變突圍援省夙  
高摧陷之勲理餉籌兵克殫勛之力僉事胡平表炳  
炳雄風堂堂偉幹血戰返魯陽之日膽落窮酋深入踐  
鬼方之墟勞宣異域馬湖府知府鄭朝棟吞夸氣壯相  
局機圓布德推誠遐方仰其威信汰虛抑競萬衆服其  
公平以上十一員皆懋殫勞績功在封疆加恩應膺特  
典中有陞任者有後至者有患病請假稍得休息者獨  
李仙品劉可訓盧安世鄭朝棟等四員始終在事誓死

不移尤勞臣之最更當破格者也原任遵義道副使今  
改叙瀘道侯國敦朴不欺廉謹有執擒酋誤報雖仍將  
士之訛入險結戎實有擒斬之績監軍副使張起鶚假  
道借兵致夸羈陷兩年在奔彌堅罵賊之忠一旦出圍  
大奮擒克之志所當併叙以俟優賚者也督餉叅政陳  
龍光持籌縝密應務焦勞念切納溝膺危病而不避計  
周活鮒綜水陸而交輸叅政吳光義長風破浪之志大  
川利涉之材省費省勞每事咄嗟立辦恤民恤卒隨時  
撙畫成宜僉事錢時應機朗若然犀握筭恢同遊又調

劑盈縮事事運以苦心奔走山原孜孜靡有餘力以上  
三臣當物力匱乏之秋殫日夜勸勅之力寔與監紀諸  
臣勞相伯仲所當破格優轉以示激勸者也各省同事  
司道在本省則原任四川布政司左布政使周著範玉  
鎔金品格昂霄聳壑才猷授兵登陴危城奠磐石之固  
分甘饗士窮民無萑楚之嗟左布政今陞太僕寺卿林  
宰衷盟天日思凜冰淵當倉皇戰鬪之衝誓甘九死酌  
多寡盈縮之用嘔出寸心左布政使史文煥品同雪嶰  
凝寒才似珠江耀采會計當而奸弊悉釐經緯明而閭



閫不擾右布政使詹爾達琮璜貴潔川瀆停泓小民饑  
溺切身計周軫恤三軍庚癸繫念力任轉輸右叅政今  
加陞二級戴燦學術雅能經世丰猷卓爾軼羣志節定  
於危撼之衝經畫周於艱窘之口按察司按察使李守  
俊恬夷縝密凝靜端方開誠而廢墜聿修執法而頑梗  
自革松潘道叅政婁九德智足禦吝誠能動物厲兵秣  
馬壁壘爲之一新起弊扶衰蠻苗望而知畏提學道叅  
議來復繡虎雕龍杰品涵海負地弘襟慷慨憂時籌筭  
精於前箸公虛得士桃李爛其盈門兵巡下川南道副

使許士奇才稱濟世梯航識明照天蠟燭視國事如家  
事檢飭靡遺切鄰憂爲已憂綢繆悉當分守川北道叅  
議翁登彥胸有萬斛才裕九還蒐乘簡兵邊郡威名丕  
震正已率屬果州雨露方新以上十員雖未到軍前而  
事事相成或發解糧餉以解士馬之饑或整飭邊防以  
成犄角之勢且各捐俸助餉勞績難泯內周著久苦沉  
淪亟應超擢林宰雖已陞遷祗是常格來復不但才品  
俱懋卽搜出缺廩五千餘金以佐軍需尤爲人情所難  
許士奇在郡備效轉輓之勞今轉巡道監紀督餉百責

交萃翁登彥續委餉務俱卓然有可紀之績併諸臣均應酬以不次用示激勸者也在湖廣則原任布政司左布政使李叔元品格孤騫心神周密手揮繁鉅四應而恢恢有餘身任劬勞百出而孜孜不竭左布政使李春茂動念憂時救世禔躬澡雪凌雲于橐于囊念震鄰而濟急偕行偕作賡無依以興歌右布政使楊楷報國務期剪寇恤鄰不吝纓冠酌盈濟虛持籌綽有妙筭救饑賑乏轉輸咸荷仁膏在陝西則布政司左布政使蕭丁泰才裕揆文奮武心懷後樂先憂闔閭弛張擔當自饒

定力輔車唇齒霑溉常有餘波以上四員秩任雖殊勤勞俱最所當一體紀錄錫賚者也經理收支餉銀重慶府知府余新民節挺雪山萬仞明同玉魄一輪佐鄰饑而剜肉補瘡痛民殘而焦毛濡首叙州府知府劉澤大砥節不茹不吐臨事任怨任勞當艱窘而節省多金處喧囂而應酬獨暇瀘州知州王新民壯氣凌雲雄才掣電督兵屢建奇勲起瘡大張風力以上三臣或當土司窺伺之衝或處滿城灰燼之餘一切餉務收支援兵出入日夜擔心經理迄有成績所當優轉以酬其勞者也

分理監紀重慶府推官李必達清脩嘯月崢嶸精敏冶  
金煅煉神閒氣整計密忠周夔州府推官蔣化龍銳志  
弘鉅克肩長才揮叱如意入險不避束伍有方遵義府  
同知管仁懷縣事商良弼籌畫窮荒起色輯柔夸漢傾  
心清苦能甘艱難備試同知冉崋規度周詳精神優裕  
聞變挺身赴敵撫荒瘠已分甘培州知州朱毅臣生來  
勁骨綽有壯心水頭天險先登城外窮酋匿跡分委督  
餉遵義府知府胡悅安老成縝密心神恬雅清虛識度  
與民無擾結士無譁叙州府同知翟文簡兩年瘴癘百

計支撐持籌區畫極精督運勤勞居最重慶府同知今  
陞南京兵部職方司員外劉國藩品同玉樹懸冰才擬  
庖刀批欸經綸曲當摘發無私叙州府安邊同知今丁  
憂王國治拮据水陸咸周綜覈纖毫必悉軍甦憔悴民  
頌廉平成都府陞任通判梁文燁譚兵魚鳥風生督餉  
梯航雲集有爲有守最苦最勞馬湖府陞任推官周嘉  
謨精心綏輯夸番勁力撐持保障士民思德軍伍啣恩  
原任江安縣知縣今陞遵義府推官陳達道身濱死而  
復生節旌危以益厲招徠得法薙獮多功達州知州黃

立言朗識獨祛奸弊長才力任勛勩源潔流清馬騰士  
飽真安州知州楊汝昇固圉久奏膚功分糈偏饒惠政  
汪淵獨柱危郡長城蓬州知州商之彝志切奉公才能  
集事出納不愆升斗調劑允協軍民西充縣知縣程士  
升偉才富有甲兵勁氣可關霹靂拊循計切跋履勞深  
運同管南川縣事韓應龍鎮重不爲威惕公廉素得民  
和績茂斬妖力勤轉運永川縣知縣張堯揆才由誠運  
威以廉生三軍喜解倒懸百姓赴如流水綦江縣知縣  
鄒昌魯烹鮮素有令名應變更饒定力繁衝就理盤錯

見奇安岳縣知縣趙民戴仗義不辭家難矢衷獨隱民  
艱借箸善籌提兵建績長寧縣知縣耿堦和繹能瞻三  
軍歷險不辭百苦身忘官樣民自子來高縣知縣傅穎  
孫布大信以撫苗鼓勞民而勤役曾無規避綽自調停  
筠連縣知縣岑昌運心常集木臨淵才自駕輕就熟錙  
銖不爽出納維均梁山縣知縣今陞雲南陸涼州知州  
周維軫忠誠出自天性勤敏動協師貞吏不爲奸士知  
感德叙州府儒學訓導饒廸兩攝荒城大攄幹濟披草  
復修墻屋躬耕以勸逃亡以上諸臣皆親履艱險力殫



籌筭均宜一體優陞以酬勞勩者也通省同事効勞官員夔州府知府史贊舜御器鎮靜端詳剖劇精明惇大法嚴奸宄惠洽瘡痍順慶府知府楊鳳念切閭閻痛癢謀先桑土綢繆民歌安堵軍不呼庚保寧府署印通判許弘綸實心實政克愼克勤疾徐甘苦常調緩急張弛各當潼川州知州姚繼崇撫綏有法匡救多能一身備殫勤劬七屬通無愆悞查理餉務保寧府推官錢允鯨品同卞瑩精瑩才似吳鉤犀利仁明并運摘發無私成都府推官李曰輔醇謹依然寒素精明綽有擔當民有

蘇霖吏無藏窟叙州府推官詹先志英明洞識物情披  
覽不爲文具升斗必覈出納維明督發調兵則萬縣知  
縣毛羽健壯志請纓擊楫清修澡雪殄冰明照逃亡力  
鋤強梗督夫押運則榮縣知縣蔣守洵勤民常切戴星  
奉檄不辭涉瘴民亡勞止軍喜來蘇南溪縣知縣王之  
朝撫字朗開心鏡撐持勁豎脊梁千艘交馳百堵皆作  
桐梓縣知縣陳揚美立身灰燼之地救民塗炭之中劇  
善調停更張控禦原任知州今改合江縣知縣劉應宸  
撫荒嘔出肺肝救民不惜胼胝法行强悍惠洽流移以

上十二員雖云未到軍前而料理經營與夫點兵柝運  
事事効勞相應紀錄優轉以示酬者也原任行都司掌  
印都司陞廣西叅將留用軍前今陞副總兵林兆鼎舞  
鷄壯志縛虎英風單刀破猥獍之關同仇義壯一戰搗  
大方之穴異域威揚原任叅將今陞松潘副總兵秦翼  
明銳志匡時英名懾敵挽弓躍馬共誇弱冠終軍出塞  
安邊克嫺乘風宗懋遊擊侯良柱英毅多謀沉雄有膽  
料敵雅同聚米賊在目中當關輒自揮戈威行域外建  
武遊擊羅乾象精神奮勵標格魁奇矢志除寇不顧妻

兒之慘冒險血戰遂成京觀之封僉書鄧懋官志切承  
家義懷切齒師中嚴紀律壁壘增輝闕外肅威稜鼠狐  
落膽守備劉養鯤黃石蟠胸青萍應手設奇擒賊神鬼  
莫測其機用夏變存知勇咸樂爲用原任都司僉書薛  
來衍產自名家才稱上駟散金饗士甘垂橐以結驩履  
險衝鋒每揚旌而耀武遊擊范繼道赤心俠骨偉畧通  
材招徠得遠人之心隱微洞悉布置若常山之勢戰守  
咸宜叅將陳一龍獨矢赤念屢抗寇鋒勁草疾風允符  
板蕩之節荒城半壁久宜乘障之勞遊擊秦拱明年齡

最少意氣偏雄賈勇先登屢奏搴旗之績秉公束伍常  
懸褭革之忠叅將張令雄稱虎賁銳若鷹揚習山川夸  
險之徑每陣居先辨苗獯虛實之情無堅不破叅將秦  
衍祚技精三畧敵學萬人彎弓欲滅天驕三軍鼓壯策  
馬不辭烟瘴千里標奇僉書譚正通勇仍天授武以家  
傳兩戰漢郾皆能以寡敵衆力殲巨寇不辭赴火蹈湯  
遊擊譚正修磊落奇標縱橫偉略殺人如蟻腰間劒血  
長腥料敵如神陣上鞭稍莫犯以上十四員在事二三  
年大小百餘戰才略俱超勲績竝懋相應查照條例破

格優異者也內范繼道有長寧之潰鄧懋官有納谿之潰薛來衍有仁懷之潰侯良柱陳一龍有安羅二村之潰臣當時革其原職取認死甘結責令立功自贖仍查出先逃各領兵官余騰龍等俱已梟示正法訖今各將皆能誓死血戰克殲驅馳相應宥罪止錄戰功以示酬勸者也都司掌印叅將周官譚兵不襲陳言製器務裨實用寬嚴得體遐邇傾心標下練兵叅將管副總兵事魯美中立志不欺不苟肅旅有翼有嚴刀斗風清貔貅氣壯中軍旗鼓守備李必茂才名烜赫意氣騰驤機權

盡出七書訓練洞精八陣湖廣巡撫標下坐營守備陸  
萬里虎頭自異豹略多奇傳宣鼓角風雄整肅牙幢色  
振旗鼓守備尹應禎胸中武庫森嚴匣裏太阿灼鑠丕  
揚威武雅任折衝鄖陽巡撫標下中軍遊擊蔣吉嗣許  
國丹裏獨炳穿霄紫氣偏高能正能奇不燐不竦旗鼓  
守備李鎮邦忠勤自誓威惠交孚揮戈自吐風雲聚米  
便成山谷陝西撫院標下中軍遊擊鄔鳴臯律嚴步伐  
止齊機運弛張動靜星旗映日霜戟排空旗鼓守備莫  
可尚胸中富龍圖之兵掌上運鷹揚之畧雄關兕角邊

塞虎牙以上各官職任不同勞績俱茂均應查照條例  
陞資者也總鎮標下都司劉宗良禦侮良才折衝巨手  
營裏關山月朗行間鼓角風雄都司僉書鄒蔚然一腔  
正氣三代直民寸舌賢於六師隻手力撐半壁僉書范  
祖文效赤獨先臨危不懼人擬銅柯鐵榦略精玉版金  
韜遊擊潘映奎氣骨霜稜才猷颺發提戈勇冠千人撥  
甲風生八面僉書胡汝高龍泉騰匣駿足軼羣冒險每  
用先登撫苗更饒妙用僉書胡肇虞家憤填胸苗情指  
掌灑泣長號月露振衣欲驟風雲守備李棲鳳雄邁不



負家聲英敏偏饒將畧迎機輒赴履險若平守備孔全  
斌雄氣逼人英材邁衆立馬馳風驟電當場敵將拳旗  
守備袁可成倜儻雄姿昂藏俠骨馭衆能知甘苦提兵  
曉暢機宜守備姚化民膽畧驅風役雨韜鈴捫虱屠龍  
介冑雄才昂藏杰品守備李忠力能扛鼎膽可包身解  
圍百戰居先應敵千人自廢守備周良材劒上星辰夜  
動師中刁斗時嚴詰戎威震應變才雄守備李國選智  
略深沉襟期慷慨鳴鞭草木皆兵仗劒豺狼匿影生員  
加銜守備汪長源氣吐成虹膽大若斗臨陣不避矢石

馭士咸服指揮守備曾遐中標格雄爽謀略周詳志耻  
左旋右抽力任前茅後勁守備譚大孝一門耀武百戰  
揚威盡稱羅網精兵不數幽燕老將守備武聲華任事  
精勤赴機敏迅陣上不愆進止行間備歷苦辛守備楊  
元沅機籌畫定力擔當傳呼檄若雷霆督陣令同風雨  
守備王胤昌銳志擒克傾囊餉士一片冰壺貯露千尋  
霜鏐橫霄守備魯希聖策馬周旋危難誓心掃蕩妖氛  
智足當機才堪遠馭守備張洪烈英風烈烈義膽稜稜  
彎弓七札能穿仗劍萬人必往加銜遊擊盧世卿譚兵

轉若弄丸審敵瞭如懸鏡驥羞伏櫪鷹快乘風守備趙  
瓚奉公志潔滅賊心勤提兵氣吐堦整馭衆恩同醪續  
加銜叅將張奏凱勇可投石超距謀精批亢擣虛復渝  
著績掃穴揚奇加銜守備金文科棄文就武矢志除寇  
久當震撼之衝大振胸縮之習加銜守備蘇廸才優武  
略志雪父冤艱難險阻備嘗魚鳥風雲克整加銜守備  
吳攀龍肅伍弓刀森密飭兵組練輝煌人稱壯士才洵  
干城守備王國臣氣奮刀頭技穿楊葉敏捷雅饒幹濟  
忠勤克效勛勩遊擊胡綬沉雄得之天賦忠義出自性

咸誓洗妖氛不辭危險以上二十九員精神奮勵意念  
忠勤或血戰衝鋒懋建捷伐之績或傳宣布置久效奔  
走之勞其已經題授者尚係虛銜暫爾加銜者祇是空  
名俱應查明功次優議陞補以示酬勸內盧世卿有象  
寄之潰譚大孝有江門之失張奏凱有落紅之失皆經  
細打重治令其褻褻血戰功浮於罪相應錄功宥罪以  
示器使者也領兵叅遊守備併督陣指揮等官雷鳴春  
羅運龍王思堯湯廷耀夏永通李棲鸞李維世羅應元  
余權中易三桂李懷李棲鳳朱一龍羅萬象范鉞秦可

秦允成譚正宸冉世烘凌九疇劉顯祖仇可陟吳一枝  
劉必達鄭孫芝張春階羅文才張學周鄒林劉世忠范  
明熙吳開先曹有才趙文進李鴻功傅元勲王尚明余  
興忠朱天祚王懋官王岷勝劉天眷張青陽段豸王文  
蔚劉萬華韋鵬譚正常黃朝星楊應海李陽會王國柱  
王元第洪綱朱邦俊任調元秦鍾英袁鏊戴來鳳鄧朝  
用丁文明陳鳳郭尚榮度朝榮胡斯化朱國才李棟呂  
年玉朱三鳳高登衢陳世禎金之純劉以節陶宗成王  
國禎王繼先蔣繼祖潘之玉馬繩祖陳于朝夏才魏民

望蕭鳴鳳馬世脩董三知金富廉吳伯秦明遠史其昌  
雷世忠許大綬徐維垣唐肅劉安國沈仍燧以上九十  
五員桓桓壯氣矯矯雄姿藉草飡風身嘗濱于九死當  
關對壘志不縮於萬人相應卽與陞擢以示鼓舞者也  
領哨加銜叅遊守把千百總等官周繼先舒遐郭思正  
尹寵任道重陳章劉茂林李效忠鄭之蕃洪日中吳世  
昌韓有習徐永祥劉偉劉朝用并見龍劉廷佑徐長春  
魯天麒錢鰲元吳尚選沈繼祖耿世昌謝遜之劉廷選  
周禦侮鍾碧玉龔崇勝楊世杰劉弘唐廷對范明雍萬

永吉李棲鵬李棲鶴張位何法劉熹王宗海陳諫王昌  
胤荀翰羅光燦楊時芳黑茂李桂周元儒何繼光胡達  
周良棟袁士弘金應宸莊亮羅尚文袁昌李舟輔趙志  
上陳祥朱朝聘胡國仁何文選李茂秀馮宗泰段繼祖  
林兆夔唐愛胡舜悅熊舉陳聘學王心一燕瑞鳳李培  
祚羅朝俊黑有仁文起武熊國陞陳文選張翰蕭德楊  
文舉杜正邦李亮何金化羅榮羅忠臣王明王訓龔惠  
畢唐二張三重劉祖武張英鄔廷高何多益安起龍萬  
明吳一言龔奇勝李仙德楊勲臣李有勇文碧羅宗啓

楊于相劉繼武余明禎韓國卿王命壽彭國賢金元音  
黃文明苟仁程九功李金祿張貴王元龍耿允恭桑鼎  
段文錦鄧伯海劉邦元閻登瀛韓自明周尚文林兆彝  
張夢弼張東升殷以質龔守智蘇騰蛟段高岳范德良  
冉紹恆宋舉雷安邦朱勝羅先燦陸元蓋陸廷楠趙明  
世王開趙崇封劉沅安允恭鍾可第艾起鵬李應學黃  
應魁劉芬王命祿程宁任祈祿彭良貴楊用楊光增陳  
善治李必吳中杰李良柱王聯甲李仙景王傑毛介方  
虎孫明蔡朝冠李方勝陳旦喻應春姚廷李官趙明遠



施賢鄒昌祚孫逢聖袁仕朝秦漢文高辛旺陳玄藻周  
繼善蕭衍慶韓廷珊黃朝榮金鱗譚大儒王鳳翔袁勲  
王時志杜化龍蕭茂先譚端趙淳陳載筆朱廷臣王應  
蛟苟正金羅之清王友權曹廷政羅之才任定乾羅之  
臣黃朝珍黃朝惠譚訓黃朝珠戴明聖魏希尚韓其昌  
黃正福黃朝棟周應道羅自發韓繼先楊冕劉大臣諫  
廷華余顯祖袁之明譚龍山譚正坤魏國見譚貢譚正  
思趙應嵩譚柄冉有元王朝盛譚加富石朝明周尚應  
張本法劉國柱劉人龍段宗玄潘起麟曾科胡道覃培

葉自第楊名世李世貴甘仕倫文仲武趙榮高喻孔學  
梁受吳茂富譚弘道蹇亨吉徐廷聰張亨文欽王應乾  
王寶曾忠余官廖萬谷曹應遴劉尚行周聯芳伯嗣勲  
熊通陳坤孫承廕李陞李榮桂毛鳳翔劉新宗胡雲鳳  
劉忠賢陳世賢田文元陳益周萬陞冉時榮秦有廉章  
良信潘鳳鳴李文胤韋光陞劉起先易應洛王懷忠游  
之江方勝駱陞高吳大臣何之珩陳王謨許雲生程天  
桂楊起蛟李之印蕭應珠趙玉舟李登芳陳王典徐仕  
華魯萬國陳懋徐昌陳明卿謝拱通李朝選劉貴選李

現玉李凝朱駱文雷應試黃鳳翔熊廷信沈應龍唐紹  
堯郭行達毋剛章士奇陳萬勝陳縉張應富胡文炳陳  
獻廷劉霞張台芳朱可榮彭祚陳善策朱朝試李友松  
以上三百二十九員舍生赴難冒險從戎存情盡在目  
中劍氣常橫天外所應查照功次分別議陞議資者也  
軍前報効原任荊州府通判張士彥原任楚雄府推官  
楊國瓚原任建始縣知縣王世道原任長寧縣知縣葛  
如綺原任重慶衛經歷張萬該原任夔州府永寧驛驛  
丞康衢原任奉節縣典史方大器原任江西德化縣典

史翟拭原任永定倉大使陳王前舉人馮名世歲貢生  
傅元和宋世第王信蘇九容卞承志生員楊祖烈周無  
咎張衍禔康鼎張瑜李中喬王寧楊逢時余丁春鄭夢  
明劉嘉慶張宸劉嘉善王延賓刁成文鄭襄明盧嘉猷  
劉向翥鄭干幹袁襄年遂袁桂芳袁舉劉紹虞譚國政  
朱寔王家棟伯安國監生孫源平武舉孟士旌滿如鏡  
以上四十六員名急公仗義擐甲枕戈或垂橐募兵直  
探虎狼之穴或舍生入險招降反側之徒不食廩餼久  
著勞勩各應查例陞職或超選或超貢以爲任事之勸

者也又查得原任綏陽縣知縣任寵首當危難久著戰功江津縣知縣周禮嘉見危不避殺賊極多雖經臣與按臣以他事論劾而去思實深岳池縣知縣段可賢除奸獨早守境多能漢州知州萬砥操守無瑕轉輸獨苦雖經議處劣轉而前勞難泯所當行勘量降原官仍行器使者也軍前分理餉官成都縣主簿何惟正宜賓縣典史陳光俊威遠衛經歷鄧可望遵義縣主簿楊熠真安州吏目王國選綏陽縣典史楊名譽永安驛驛丞李紹金墊江縣典史王政行管造火藥造船官合州州同

江濟南合江縣主簿王繼泰典史黃漢清史霸驛驛丞  
胡春元牛腦驛驛丞汪元燧神山驛驛丞戴君恩李市  
鎮巡檢陳仲文原任瀘州稅課局大使宋淳合屬解餉  
官叙州府經歷焦自燦檢校金如璋叙州府陞任知事  
徐宥瀘州州同劉邦化寧川衛經歷周希堯宜賓縣縣  
丞岳毓英蓬溪縣主簿孫光裕樂至縣主簿劉國助典  
史李文英新津縣主簿馬應龍南溪縣典史黃君鼎屏  
山縣典史沈光啓雅州吏目張時習蘆山縣典史虞廷  
臣以上三十員押運進剿勤勞俱懋合加陞賚以示激

勵石砭宣慰司總兵官秦良玉矢衷慷慨督部嚴明仗  
義聲傳遠徼除寇功滿全川鎮雄府知府隴應祥當波  
濤震撼之衝守松柏堅貞之節處紛不擾在濁能清烏  
蒙府知府陸祈忠誠自誓安靜無管上下允號同心患  
難彌堅素節龍安土通判加銜知府李泮忠肝天日爲  
懸肅法冰霜共凜驅馳最久勞績居多土通判加銜同  
知王鼎年齡英茂意氣恢宏開營山月穹窿力戰陣雲  
飛舞真安州土州判駱麟聞警輒投袂而起捧檄不介  
馬而馳功著捍圉才長應變忠路宣撫司應襲單懋勲

將門有種苗部絕倫挽弓力饒百石舉旗氣奪千夫內  
秦良玉援省復渝著有勞績已經題叙茲駐納谿數月  
以病假歸而其部將秦可郭起柱等俱竝建奇績各將  
之功寔良玉之功李泮自成都未圍之先首先赴援在  
事最久而功最著駱麟保障新疆久著勞績覃懋勲古  
蘭之戰賈勇先登均應破格酬勸者也土同知陳治安  
土州判鄭延泰土舍冉達龍冉紹文夏得聞安文元悅  
先民王立極以上八員名屢經調發効有戰功應照例  
厚賚者也降將王繼宗焦從智羅甫畢應台夏國卿劉



譜羅于朝趙國璽雷振乾張學禮羅安良鄢价羅書成  
舒廷采楊柳周朝臣羅向宸羅文垣羅向榮扶國清游  
朝柄游朝坤鄭一顯王來聘秦國俸楊選胡世孝等二  
十七名皆相無反骨胸抱赤腸明禍福逆順之機倒戈  
自效識箐林洞穴之路投袂直前旣爲順民卽吾赤子  
今已暫給加銜俟其建有殊勛卽應照例實授以酬其  
勞者也死事各官如原任松潘道副使李忠臣脫窶無  
計報國有心及機泄以當克遂闔門而死難遵義道僉  
事趙邦清氣若轟雷震電計圖滅賊擒王壯骨雖埋奇

功難掩副使加陞一級赫奕精嚴操履恪慎才猷轉輸  
克殫心神跋涉不辭勞瘁以上三臣如李忠臣謀賊不  
勝反爲賊殺功雖未成節實堪閔趙邦清有恢復之績  
赫奕效轉輸之勞竝中瘴癘溘死道途所當查照明例  
分別從優議恤者也死事各將士除總兵楊愈懋推官  
馮鳳雛等已經題明者不再開外如加銜守備潘一麟  
劉兆斗孔之譚遵義道中軍蘇民心富順縣縣丞姚一  
煒蜀府奉祠張大任貢生周宸生員朱國賓聶天品義  
民瞿繼龍楊佐徐芳桂徐教二傳文玉李榮玉友惠朝

又永寧倡義與副使李忠臣同時遇難生員胡稱寧沈  
芹劉佐聖江映星指揮丘道隆千戶陳大策義民杜林  
徵何枝以上或血戰以捐軀或舍生以取義遺骸雖化  
爲腐草正氣未泯於重泉久著戰功在營病死則原任  
叅將張邦紘茂州衛指揮曹守爵守備張明遠降將宋  
武胡汝寧或周旋危難大著斬殺之績或首先向義縛  
獻僞相之俘勤勞最著絲髮未酬所當一併查勘分別  
優恤者也叙州府同知管合江縣事劉鼎新叙州府通  
判牟道立隆昌縣知縣黃榜原任長寧縣主簿陞神武

衛經歷沈維翰成都衛經歷陳大祉吏目向光問永川  
縣典史張慥先高縣典史羅廣譽犍爲縣典史劉位奉  
節縣典史劉仲臣畢節衛指揮裴有章加銜遊擊袁鑾  
加銜將官任國瓚范寵劉誥吳聿然羅仕傑彭述古江  
應宿王世安周應宿潘繼美朱朝爵曾繼美馮耀顯吳  
三省何承胤龔崇貴鄧紹虞程尚策韋加友趙甫國葉  
永秀張璠陳朝舟何正光以上三十六員或以督運染  
瘴或以臨陣負傷勤勞夙著溘死堪嗟并另冊所開均  
應分別議恤以示浩蕩軍前効勞吏承在臣衙門書辦

布政司候缺通吏李一高一考令史張經猷按察司兩  
考役滿照例見歷三考書吏馮璣一考書吏唐承堯各  
經管兵馬錢糧章奏効勞最久承差雷灝朱人隆余彭  
龍布政司知印承差何致祥齋奏勤渠四川按院衙門  
書辦布政司候缺通吏許士奇胡拱宸布政司知印承  
差劉應選湖廣撫院衙門書辦布政司吏榮伯聰楊之  
奇承差杜詩陝西撫院衙門書辦布政司通吏高耀候  
缺令史權鳳鳴監軍道右布政使李仙品下書辦按察  
司一考典吏丁正印劉繼寧叅政王世仁下書辦按察

司一考書吏葉宗彥僉事劉可訓下書辦按察司吏袁  
起蛟僉事段師文下書辦按察司吏張時仕僉事盧安  
世下書辦按察司一考書吏許鳴登督餉兵巡川西道  
叅政吳光義下効勞承差陳世簪在京抄報先後提塘  
官朱國祐韓遇春吏陳治道俱克勤公務應查舊例示  
酬其餘在事官員不能盡錄臣酌量徑行獎賞除將各  
路擒斬等項功次員役造冊徑咨兵部外伏乞勅下該  
部查將前項應陞應錄應賞應恤各員役照冊通行巡  
按御史查勘明實徑自具奏施行庶賞罰明而戎務知

所勸勵矣爲此具本謹題請旨天啓五年二月初四日  
上奉聖旨該部知道

塘報進兵施兵失利

爲塘報事遵義之兵城內分門屯守城外憑高劄營十二月內趕殺西兵至板角山等處及永兵兩路過河斬功俱經揭報訖天啓五年正月初八日據遵義監軍僉事盧安世塘報連日擒斬細作吳乾等數十名梟示外至十二月二十八日辰時奢寅糾合西目阿烏迷莫德趙國政楊維新等統賊數萬蜂湧將府城圍困攻打盧僉事同副總兵林兆鼎副將侯良柱陳一龍張奏凱等分縶晝夜用七稍砲銃箭對打傷死者極衆職等筭知



賊裹糧而來勢不能久傳令外營據險石砲射擊慎勿輕動候賊疲聽號追殺偵得賊劄十營於河梁三十四營在羅會水欲誘我兵正月初一日本道分林副總發張奏凱等一猛分門衝出南門迎敵銃傷百餘打死十賊侯良柱發加銜將官傅元和督王繼宗出壯門銃箭傷者八十餘應手死者一十二賊陳一龍督兵出東門殺敗賊兵趕至獅子橋溺水死者無筭生擒者極多查確另報各路之賊亂竄奔逃奉令收兵入城至初三日卯時賊添兵用雲梯將城復圍綏陽縣署印推官陳達

道奉令發勇兵三千赴援黔將許成名督兵亦至本道  
大發懸賞大開四門內外夾攻自卯至酉賊不能抵跟  
踰而走我兵分道殺擊設連珠營追殺四十餘里連羅  
會水等賊營通行殺散四將斬功一千餘顆生擒五百  
餘名馬一百餘匹裝糧皮袋二百餘箇器械不計其數  
復令板角圍將官陳鳳胡斯化等伏兵斷送後兵繼追  
又斬擒多功丟棄槍刀滿地奔逃過河查明冊報等因  
先該黔省屢約春初會師未有的期因重兵已集業移  
檄各路俱於正月二十六日誓師以二月十一日會兵

大方至正月二十六日忽得該省檄文約於正月二十七日會兵水西除遵義路先得知會卽應期發進本部院隨督發永寧一路俱於三十日齊進外至二月初二日忽據監軍盧僉事副總兵林兆鼎副將侯良柱陳一龍張奏凱同黔將許成名等各塘報各將奉令時刻不懈五路發先鋒攻洗石壁等箐以掃阿烏逃後路聞黔兵已入四將星夜奮勇進發至二十四日天明到白蠟坎遇賊入營在彼我兵奮力大殺斬級二百餘顆連夜趕殺匿箐至二十五日五鼓各軍齊到水園頭又進入

八里水突遇黔省監軍僉事越其杰併各兵奔出六十  
有奇等因又據發往龍場將官劉宗良張令等擒獲細  
作王佐供報相同今蜀兵仍劄要路候黔信以爲進止  
理合一併塘報本部煩請案候事寧查叙施行天啓五  
年二月初四日塘報兵部職方司